

Parlamentario Eduard Pieters (PPA):
**“CURA CABAY TA UN MESCLA DI
CULTURA, CONTAMINACION Y
NEGLIGENCIA”**



WWW.SOLODIPUEBLO.COM



SOLODIPUEBLO@GMAIL.COM

HOMBER DI 62 AÑA DETENI NA KAMAY Y GARA CU HOPI PLACA Y DROGA

Diabierna atardi Unit Narcotica a haci un entrada hudicial na un percela na Noord den bario di Kamay. Trabou duro y un investigacion relampago a conduci cu a canta bingo!

A encontra un gran cantidad di placa tambe droga. Tur esakinan a keda confisca.

A detene tambe un hende homber naci na Aruba di 62 aña.

Pa e accion aki a haci uzo di diferente departamento di Cuerpo Policial. Entre otro Flex Team, polis uniforma, K-9 Unit, BFTO y RRT.

E accion aki tin di haber cu bendemento di droga for di percela.

Cuerpo Policial ta keda haci un apelacion na nos comunidad cu sa algo of a wak algo pa yama e tiplijn di polis cu ta 11141. Bo ta keda anonimo.

TRUMP A AFIRMA CU MERCA A DESTRUÍ NUEBE BARCO DI GUERA IRANÍ



A CONFIRMA FAYECIMIENTO DI E LIDER SUPREMO DI IRAN, AYATOLLAH ALI KHAMENEI

HISAMENTO DI BANDERA: INICIO OFICIAL DI CELEBRACION 40 AÑA



GRUPO DESPEGAR A PREMIA ARUBA COMO E DESTINACION LIDER DEN LATINO AMERICA

“El destino con mayor crecimiento en ventas en Latino America. Y este reconocimiento es para Aruba”, asina a anuncia diaranson anochi riba escenario durante un evento organisa pa Grupo Despegar na Cumbia House na Bogota. Ronella Croes, CEO di Aruba Tourism Authority acompaña pa Jordan Schlipken-Croes, director di A.T.A. Latino America, a acepta e premio aki den nomber di e entidad cu tin como meta pa promove y desaroya turismo riba nos isla.

E reconocimiento tabata un combinacion di relacion comercial cu e partnernan principal di grupo Despegar cu ta inclui marcanan renombra manera Viajes Falabella, HotelDo, entre otronan. E evento a reuni e instancianan di biahe cu a traha cu e grupo na nivel di Latino America, mas di 7.000 agencia, como tambe e cadenan hotelero principal di Colombia y e otro mercadonan strategico maneha for di Colombia, manera Peru, Ecuador y Argentina. En general, a conta cu e hotelnan y e aliadonan di mas importante conecta na e red comercial di e grupo den e region.

Durante e evento a realisa un premiacion breve, caminda a entrega aproximadamente 10 reconocimiento na e parternan cu mas a destaca, entre nan 2 destinacion, hotelnan y e top agencianan. E tabata un espacio enfoca riba fortalecimiento di relacionnan comercial cu e aliadonan principal.

Siman di ANATO

Despegar ta hunga un rol esencial y ta participa den grandi na e conferencia “Vitrina Turistica”

di e Asociación Colombiana de Agencias de Viajes y Turismo – ANATO. E aña aki ANATO a tuma luga for di 25 te cu 27 di februari na Bogota cu e tema “Colombia abierta al mundo” y a conta cu mas di 1.600 exposicion y un publico di alrededor di 10 mil participante pa dia.

“Aruba Ariba”

E sorpresa aki a cay den masha bon tera cerca Ronella Croes. E CEO di A.T.A. a gradici tur cu a traha duro pa Aruba por a sobresali y pa prome biaha den historia ta logra un semehante reconocimiento. El a referi na e ekipo di A.T.A. Latino America pero tambe e oficina principal di A.T.A. na Aruba, sin lubida tur partner cu a reconoce cu ora traha hunto ta logra cosnan grandi. Ronella Croes a subraya cu nomber di Aruba a resalta banda di un pais manera Panama, considera un “hub turistico” importante pa Latino America. Y nos, Aruba...un isla chikito den Caribe, ta resulta esun cu a crece mas y como tal ta regresa cas cu e premio principal.

“Pa pone un poco mas den contexto, Despegar ta representa no menos di 22% di tur pasahero cu ta yega Aruba desde Latino America, pues ta un socio masha importante cu a presenta un premio hopi prestigioso na nos, esta pais lider pa nan pa e region completo di Latino America”, tabata palabranan di Ronella Croes.

“Orguyo”

E palabra cu mas a resalta den e prome reaccion di Jordan Schlipken-Croes, director di



A.T.A. Latino America tabata “orguyoso”. “Pasobra ta haci un trabou cu e intencion pa logra nos obhetivonan, pero nunca bo ta spera di ricibi un reconocimiento. Awo ricibi un reconocimiento semper ta special, pero ora ricibi un reconocimiento di un compania cu tin un balor di dos biyon di Dollar Mericano, un compania cu ta e mas grandi den Latino America, realmente ta un honor hopi grandi pa Aruba”. Jordan Schlipken-Croes a termina sigurando cu esaki, atrobe, ta un momento di orguyo pa henter e ekipo di A.T.A. y pa Aruba henter!

Tocante Grupo Despegar

Despegar ta e agencia di biahe online lider den Latino America, cu mas di 25 aña di experiencia y operacion na mas di 20 pais, incluyendo un presencia fuerte na Colombia. E ta ofrece un plataforma integral pa reserva vuelo, hotel, paquete, huur di auto y actividadnan.

A funda Despegar na aña 1999 y desde cu a fund’e e ta un ehempel di digitalisacion di turismo den e region. Despegar ta presente na Colombia, Argentina, Bolivia, Brasil, Chile, Costa Rica, Ecuador, El Salvador, Guatemala, Honduras, México, Nicaragua, Panamá, Paraguay, Perú, Puerto



Rico, República Dominicana, Estados Unidos y Uruguay.

Tocante Aruba Tourism Authority (A.T.A.)

A funda Aruba Tourism Authority ‘Sui Generis’ dia 1 di januari 2011. Un organizacion independiente, pero den un esfera publico. Aruba Tourism Authority ta fungi como ‘Destination Marketing and Management Organization (DMMO)’ y ta responsabel pa uni interes turistico entre socionan local y internacional. A.T.A. ta pone hopi enfasis riba e e modelo di “High Value-Low Impact”, un balans entre di un banda aumenta e balor economico di e bishitante y na otro banda posiciona Aruba como un pais desea y sostenibel. E meta ta pa aumenta entrada pa medio di calidad di turismo en bes di cantidad.

A CONFIRMA FAYECIMIENTO DI E LIDER SUPREMO DI IRAN, AYATOLLAH ALI KHAMENEI



TEHRAN / WASHINGTON – Den un suceso cu a cambia rumbo di e conflicto na Medio Oriente, a wordo confirma e morto di e maximo lider di e Republica Islamico di Iran, Ayatollah Ali

Khamenei. E noticia a keda ratifica pa fuentenan oficial despues di un atake militar masivo coordina pa Estados Unidos e Israel.

E lider religioso y politico, kende tabatin e ultimo palabra den tur asunto di estado na Iran for di aña 1989, a perde su bida den locual Presidente Donald Trump a describi como un "operacion di exito sin precedente". Segun e prome informenan, Khamenei tabata hunto cu varios alto mando di e jefatura militar na momento di e agresion.

Un golpi mortal na e mando Irani

E noticia di su morto a wordo confirma pa e

cadena Fox News, caminda Presidente Trump a declara cu "48 lider a cay di un solo bes". E fayecimento di Khamenei ta representa e caida di e figura mas poderoso di e nacion persa, lagando un bashi di poder den un momento di guerra habri.

Merca a duna di conoce cu e atake a destrui tambe gran parti di e infraestructura di mando naval y militar di e pais. "E ta avanzando rapidamente," Trump a manifesta, señalando cu e inteligencia Mericano tabata sa exactamente e posicion di nan obhetivonan.

Reaccion Internacional

Mientras cu na Washington

e ambiente ta uno di triunfo militar, na e capital Tehran reina un silencio absoluto y incertidumbre total. Analistanan internacional ta premira un destabilisacion den e region, mirando cu Ali Khamenei tabata e simbolo di e resistencia Iraní contra Occidente pa mas di tres decada.

E morto di e Ayatollah, kende tabatin 86 aña di edad, ta marca e fin di un era. Te asina leu, no tin claridad ken lo por sucede su persona den e puesto di Lider Supremo, considerando cu hopi di su conseheronan mas cerca tambe a fayece den e mesun atake.

HOMBER DI EDAD A CAY RIBA CAYA Y TABATA HERIDA NA SU CARA

Celsiusstraat, Oranjestad: Diasabra den oranan di anochi presencia di polis a wordo pidi den Celsiusstraat pa un homber herida, cu tabata sinta abou dilanti di un cura di cas.

Na yegada polis enberdad a bin topa cu e homber aki, tabata trata di un persona di edad, su cara tabata tur na sanger.

E agentanan a bay papia

cu e homber pa trata na saca afo kiko lo por a pas'e, pero e homber no por a duna mucho informacion, tur cos tabata indica cu e homber lo tabata bou influencia y a cay dal su cara.

Polis a pidi pa presencia di ambulance, na e sitio e paramediconan a trata e homber y despues a transporte pa hospital pa un tratamiento medico mas avansa.



MOTOCICLISTA GRAVEMENTE HERIDA TRANSPORTA PA HOSPITAAL



Bushiri - Diadomingo maruga den careda di 3'or y mey polis mester a bay cu urgencia rotonde di Bushiri, pa un accidente di brommer.

Polis a yega y a topa cu un brommer Harley Davidson basta grandi benta abou, banda di dje algun persona rond di e motociclista cu tawata

seriamente herida.

Riba caminda por a mira un rastro di brake. Posiblemente momento cu e motociclista kier a reacciona ya tawata laat y ta dal cu hopi forza contra e beton cu ta rond di e structura.

Mirando e situacion di e cabayero a pidi

ambulance cu urgencia. Paramediconan na yegada a actua mesora y a lanta e victima pa sali direccion Hospitaal cu ne.

Departamentonan concerni a ser poni na altura di e sucedido serio aki.

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



TRUMP A AFIRMA CU MERCA A DESTRUÍ NUEBE BARCO DI GUERA IRANÍ

WASHINGTON D.C. – Den un serie di declaracionnan impactante via su plataforma Truth Social, Presidente Donald Trump a duna di conoce cu forsa militar di Estados Unidos a logra destrui nueve barco di guerra di Iran. Segun e mandatario, esaki ta parti di e operacionnan recien den e region di Medio Oriente.

E mandatario Mericano a informa cu e barconan destrui tabata di gran importancia estrategico. "Nan a caba di informmi cu nos a destrui y hundi nueve barco di guerra Irani, algun di nan relativamente grandi y importante. Nos ta bay pa e resto. Pronto nan tambe lo ta flotando na fondo di lama!", Trump a skirbi den su estilo saracteristico.

Atake na e Base Naval

Fuera di e barconan hundi, Trump a afirma

cu e forsanan Mericano a ataka y destrui practicamente henter e Cuartel General Naval di Iran. A pesar di e magnitud di e atakenan aki, e Presidente a comenta cu un tono sarcastico: "Pa e resto, nan Armada ta masha bon!".

Liderazgo Politico-Militar bou candela

Den declaracionnan adicional na prensa, e Presidente a sigura cu e ehercito Mericano ta tin gran exito den nan obhetivonan. Trump a menciona cu rond di 50 miembro di e mando halto politico y militar di Iran a perde nan bida durante e atakenan.

Durante un entrevista cu e presentadora di Fox News, Jacqui Heinrich, Trump a duna e cifra exacto di 48 lider cu a cay den un solo biaha. E noticia aki ta bin despues cu a confirma e fayecimento di e Lider Supremo di Iran, Ayatollah Ali Khamenei, hunto cu varios otro



oficialnan di rango halto, como consecuencia di e agresionnan combina di Merca e Israel.

Avance rapido

"Ningun hende por kere e exito cu nos tin ... y e ta avanzando rapidamente," e mandatario a conclui, indicando cu e operacionnan militar lo sigui te ora cu e obhetivonan wordo cumpli completamente.

INMEDIATAMENTE - NOS TA BUSCANDO -

FULL TIME ALL AROUND HELPER & DELIVERY

ALL AROUND HELPER CU FORSA Y
MESTER TIN EXPERENCIA DEN
CARPINTERIA GENERAL

- * EPB TECHNIQ OF LTS TECHNIQ ✓
- * PERSONA MASCULINO ✓
- * LOCAL OF PERMISO CU PASPOORT VALIDO ✓
- * ENTRE 30 Y 50 AÑA DI EDAD ✓
- * DRIVER MESTER TIN RIJBEWIJS B + C VALIDO ✓
- * BON CONDICION FISICO ✓
- * PRUEBA DI BUENA CONDUCTA TA UN MUST ✓

APLICA Y
FORMA PARTI
DI NOS TEAM!



Pa mas informacion
CAS di MAX, Meiveld 3A-1
Pa aplica manda CV na email casdimax@gmail.com
- wzp na 699-5511 -

Orario: dialuna 2 - 6pm | diamars pa diabierna 9 - 1pm • 2 - 6pm | diasabra 9 - 5pm

Parlamentario Eduard Pieters (PPA): “CURA CABAY TA UN MESCLA DI CULTURA, CONTAMINACION Y NEGLIGENCIA”

Parlamentario Eduard Pieters a bishita Cura Cabay pa sinta cu e amigonan di Centro di Pesca Cura Cabay, un proyecto cu mas di 10 aña pasa a muestra vision, cultura y desaroyo economico local. Loke a cuminsa na 2016 bou liderazgo di ex-minister Otmar Oduber tabata un inversion den nos identidad maritimo: un espacio digno pa e piscadornan, un pier renoba y amplia na 2018 bou di mesun ex-minister Oduber y un vision pa conecta piscamento cu turismo. Awe, e realidad ta mescla cu orguyo y preocupacion serio.

Un proyecto manteni cu nan propio placa Eduard a indica cu: “Centro di Pesca Cura Cabay ta mas cu un estructura fisico. Ta un punto di encuentro cultural, unda e piscadornan por sinta prome of despues di bay lama, warda nan ekipo y pasa un momento comunitario. Durante aña, e propio piscadornan mes ta paga mantencion for di nan propio saco pa reparacion di e luznan, mantencion basico y cuido di e pier”. Pero amor pa tradicion no por reemplaza responsabilidad di gobierno. E boltsnan mester mantencion tecnico. E iluminacion ta crucial pa seguridad, ora nan drenta of sali mainta trempan of anochi. “E vision original tabata cu e espacio por

evolucionar tambe den un niche economico: si e piscadornan haya e huurgrond y edificio bandona banda pabou, nan por bende pesca fresco directo, specialmente cu e turistanan di p.e. Hotel Secrets, cu a habri su portanan caba na San Nicolas. Esaki lo ta un experiencia autentico, local, cu por genera entrada pa e Centro di Pesca mes y comunidad. Pero e potencial aki ta core riesgo.”

Contaminacion cu no por ignora Un di e tankinan cu tin sludge tin un scheur. Resultado? Petroleo ta lek y ta drenta den lama. E piedranan blanco cu a pone pa embeyece e lugar awor ta preto preto. E bahia ta muestra señal cla di contaminacion. E piscadornan a muestra e situacion preocupante cu prueba cla: algun an “a pasa nan a haya piscanan morto ta drief den awa, lodo acumulando y mata straño naciendo na rand di pier. Unda ta e accion ambiental? Unda inspeccion tecnico ta? Unda intervencion inmediato ta? Segun Eduard: “E tanki aki no ta solamente un defecto structural. Ta un riesgo pa medio ambiente, pa economia local y pa salubridad publico. Fraccion di PPA ta haci un apelacion cla: gobierno mester interveni



urgentemente pa stop e lekmento di petroleo y protega e bahia”.

RWZI y maneho incoherente Banda di esey, tin cuestion serio riba e maneho di pasado di RWZI. Capacidad limita cu a wordo sobrepasa pa basta tempo cu demasiado truck di chica pos. Resultado? Awa sushi mester wordo descarga di algun forma. Y e sospecha ta, cu parti di e descarga aki ta yega den e bahia di Zeewijk. E efecto visual ta alarmante: acumulacion di lodo na varios caminda y na rampa di pier. E rampa ta casi inoperabel, ora lodo

acumula. P’esey fraccion di PPA ta urgi gobierno pa manda excavator limpia e zona (“dredging”), pa e piscadornan por subi y baha nan boto cu seguridad.

Habri e boca: solucion practico cu ta warda accion Finalmente, un medida simpel cu por duna alivio inmediato: habri e boca atrobe. Actualmente, e piscadornan mester nabega 30 minuut pa drenta y 30 minuut pa sali. Esaki ta costa nan un tanki di gasoline extra cada biaha. E boca tabata habri caba. E peticion di e piscadornan ta rasonabel: bolbe habri pa spaar tempo, placa y

combustibel.

“Cura Cabay ta simbolo di resiliencia cultural. Pero amor pa tradicion no por substitui gobernacion responsabel. Nos no por celebra piscamento como patrimonio y na mesun momento laga contaminacion destrui su base. Nos no por papia di economia primario, mientras infraestructura ta deteriora,” Eduard a vocifera.

Gobierno mester interveni awor, protega medio ambiente, sostiene e piscadornan y honra un proyecto cu a demostra balor real pa Aruba.

HEFE DI PENTAGON A BISA CU MERCA NO A CUMINSA E CONFLICTO CU IRAN, PERO LO TERMINE



WASHINGTON /TASS/.
Secretario di Defensa
di Estados Unidos, Pete
Hegseth, a declara cu
Estados Unidos no a
cuminsa e conflicto cu
Iran, pero cu nan lo
termina esaki.

"Nos lo no tolera misilnan
poderoso apunta riba
e pueblo Mericano. E
misilnan ey lo wordo
destrui, hunto cu e
produccion di misil di
Iran. E marina Iraní lo
wordo destrui. Y, manera
Presidente Trump a bin ta
bisa henter su bida, Iran
lo no tin nunca un arma
nuclear. Estados Unidos
no a cuminsa e conflicto
aki, pero nos lo termin'e.

Si bo mata of menasa
Mericanonan na cualkier
parti di mundo , manera
Iran a haci, nos lo persigui
bo, y nos lo mata bo," el a
skirbi riba e red social X.

Desaroyo di e Conflicto
Estados Unidos y Israel a
lanza un operacion militar
contra Iran diasabra
ultimo. Ciudadnan grandi
di Iran, incluyendo
Teheran, a wordo ataca.
Cas Blanco a hustifica e
ataque citando supuesto
menasanan di misil y
nuclear for di Iran.

E Cuerpo di Wardador
di Revolucion Islamico
(IRGC, unidadnan elite di
e Forzanan Arma di Iran)

a anuncia un operacion di
vengansa na gran escala.
Tabatin informacion di
misilnan y dronenan lanza
for di Iran, y sirenan di
alarma di aire a zona den e
area di Tel Aviv.

Impacto Regional
Segun e agencia di noticia

Mehr, basenan militar
di Merca na Bahrain,
Jordania, Qatar, Kuwait,
Emiratonan Arabe Uni
(UAE), y Arabia Saudita
tambe tabata obhetivo
di e atakenan. Paisnan
den e region ta cerando
nan espacio aereo, y
companianan di aviacion

ta suspendiendo buelonan.
Television di estado di
Iran a informa cu e Lider
Supremo, Ali Khamenei, a
keda mata den un ataque
riba su residencia riba
mainta di 28 di februari, y
e pais a declara 40 dia di
duelo.

RICIBI **AWG100** **GRATIS NA**

OP=OP
voordeelshop

ORA DI CUMpra UN PRODUCTO DI E LINEA BLANCO DI ELECTRO STAR!

E campaña ta valido te cu 31 di maart 2026

CUMpra AWO
Avenida Milio Croes 41
(+297) 280 0222

electro

SOLO
Di Pueblo

BRIYANDO FUERTE • TRECIENDO CLARIDAD

BOT-K9 TA DI VITAL IMPORTANCIA PA SIGURIDAD DI KIA



Diabierna mainta, Minister Dowers a reuni cu personal di BOT-K9, e unidad di cacho encarga cu siguridad den KIA. Mirando e falta di atencion na e personal durante e ultimo gobierno, Minister di Husticia Arthur Dowers a haya necesario pa sinta na mesa y scucha e preocupacionnan di e empleadonan di e organisacion cu defacto e mandatario di husticia mes a funda na final di 2011.

Durante e reunion, e personal a expresa cu tin falta di autonan di trabao pa por haci nan trabao diario efectivamente. Sin e recursonan logistico necesario, e capacidad operacional di e unidad ta keda limita, algo cu ta afecta directamente e nivel

di siguridad.

Ademas, tin necesidad pa mas cacho di K9 nobo. Actualmente e unidad di BOT-K9 ta opera cu 9 cacho specialisa di K-9, pero tin necesidad pa mas. Algun di e cachonan den funcion ta yegando nan edad di pensioen y pronto lo sali for di servicio. Un planificacion structural pa reemplaso ta esencial pa mantene continuidad y efectividad den e unidad.

E miembronan di BOT-K9 tambe a comparti otro retonan relaciona cu nan trabao diario, incluyendo gastonan adicional di mantencion pa cada cacho. Cuido, entrenamiento y bienestar di e cachonan aki ta un responsabilidad serio y un inversion directo den siguridad.

BOT-K9 ta consisti di un grupo dinamico y motiva di agente cu ta dedica nan nan trabao. Nan trabao ta di vital importancia pa mantene siguridad den KIA y proteha tanto personal cu ta traha den KIA mes, pero tambe e bishitante.

Pa Minister Dowers, e tabata un momento importante pa sinta cu e grupo di BOT-K9 y a indica cu su ekipo lo studia e puntonan presenta y lo tuma accion pa fortifica e unidad di manera sostenibel.

BOT-K9 is van vitaal belang voor de veiligheid van KIA

Vrijdagochtend heeft minister Dowers een ontmoeting gehad met het personeel van BOT-K9, de hondeneenheid die belast is met de veiligheid bij KIA. Gezien het gebrek aan aandacht voor het personeel tijdens de vorige regering, achtte minister van Justitie Arthur Dowers het noodzakelijk om aan tafel te gaan en de

zorgen aan te horen van de medewerkers van de organisatie die de minister zelf eind 2011 heeft opgericht.

Tijdens de bijeenkomst gaf het personeel aan dat er een tekort is aan dienstvoertuigen om hun dagelijkse werkzaamheden effectief uit te voeren. Zonder de nodige logistieke middelen blijft de operationele capaciteit van de eenheid beperkt, wat direct invloed heeft op het veiligheidsniveau.

Daarnaast bestaat er behoefte aan meer nieuwe K9-honden. Momenteel opereert de BOT-K9-eenheid met 9 gespecialiseerde K9-honden, maar er is behoefte aan uitbreiding. Enkele van de honden die momenteel in functie zijn, zullen binnenkort uit dienst treden. Structurele planning voor vervanging is essentieel om de continuïteit en effectiviteit van de eenheid te waarborgen.

De leden van BOT-K9

deelden tevens andere knelpunten met betrekking tot hun dagelijkse werkzaamheden, waaronder extra onderhoudskosten per hond. De verzorging, training en het welzijn van deze honden vormen een serieuze verantwoordelijkheid en een directe investering in veiligheid.

BOT-K9 bestaat uit een dynamische en gemotiveerde groep agenten die toegewijd zijn aan hun werk. Hun inzet is van vitaal belang voor het handhaven van de veiligheid binnen KIA en voor de bescherming van zowel het personeel dat daar werkzaam is als de bezoekers.

Voor minister Dowers was het een belangrijk moment om met de BOT-K9-groep in gesprek te gaan. Hij gaf aan dat zijn team de aangedragen punten zal bestuderen en maatregelen zal nemen om de eenheid op duurzame wijze te versterken.

HISAMENTO DI BANDERA: INICIO OFICIAL DI CELEBRACION 40 AÑA STATUS APARTE Y 50 AÑA HIMNO Y BANDERA



Cu un acto simbolico na rotonde di Aeropuerto Internacional Reina Beatrix, awe prome di maart, Aruba a duna inicio oficial na un periodo di celebracion historico: 40 aña di Status Aparte (1986–2026) y 50 aña di Himno y Bandera

(1976–2026).

E luna di maart semper tin un significado special pa Aruba. Dia 18 di maart ta recorda e entrega di e Moción na Mesa Rondo na Den Haag na 1948, un momento decisivo den e lucha pa mas autonomia. E proceso aki a culmina



cu e realisacion di Status Aparte riba 1 di januari 1986, ora Aruba a bira un pais autonomo dentro di Reino Hulandes.

Den e marco aki, Prome Minister di Aruba mr. Mike Eman, acompaña pa e Minister mas hoben di Gabinete AVP-Futuro Wendrick Cicilia, como tambe 40 hoben/mucha, a hisa en total 35 bandera, simbolizando orguyo nacional, continuidad den generacion y e compromiso cu futuro di Aruba.

Un lucha cu a pasa di generacion pa generacion. Den su discurso, Prome Minister Mike Eman a enfatisa cu e celebracion aki no ta solamente un recordatorio di historia, pero un momento di reflexion riba e esencia di nos identidad como pueblo.

“E derecho di un pueblo pa determina su propio destino, ta e logro mas

grandi cu un nacion por alcanza,” el a declara. “E sentimento aki a brota for di inicio di siglo pasa y a pasa di generacion pa generacion.”

El a recorda e lidernan visionario, cu a marca e rumbo di Aruba, Henny Eman, Shon A. Eman, Betico Croes, Juancho Yrausquin, desde e prome gritonan pa mas autonomia, te cu e lidernan cu a culmina e proceso cu Status Aparte. Segun Eman, cada generacion a carga e mesun deseo: cu Aruba por tuma su mes decisionnan tocante su futuro, su desaroyo economico, su conexion cu mundo y su responsabilidad social pa cuida e mas vulnerabelnan.

Hubentud como simbolo di continuidad

Un elemento central di e ceremonia tabata e presencia di 40 hoben, representando simbolicamente e 40 aña

di Status Aparte. Segun Minister President, esaki ta un señal cla cu e siguiente generacion ta prepara pa sigui carga e vision di Aruba.

“Cada generacion a recoge e sentimiento aki y a proyecta esaki den su propio epoca, cu mesun pasion y compromiso,” el a expresa.

E celebracion nacional lo sigui durante e luna di maart cu diferente actividad cultural, educativo y conmemorativo, tur enfoca riba orguyo nacional, historia comparti y compromiso pa futuro.

Cu bandera hisa na aeropuerto, porta di entrada di nos pais, Aruba oficialmente a cuminsa un celebracion cu no solamente ta honra pasado, pero reafirma su determinacion pa sigui traha como un nacion cu identidad propio y responsabilidad comparti.

STINGRAY SWIMMING TEAM SUMAMENTE ORGUYOSO CU SU ATLETA ELITE ELISABETH TIMMER NA OSNABRÜCK, ALEMANIA

Stingray Swimming Team ta masha orguyoso pa anuncia un otro logro grandi di nos atleta elite Elisabeth Timmer, cu a cuminsa aña 2026 cu un presentacion fuerte riba escenario internacional. Elisabeth a obtene un tremendo resultado, djis na comienso di temporada 2026 na durante e competencia: Schwimm Meeting Nettebad 2026 na Osnabrück, Alemania.

Aunke esaki tabata su prome competencia di aña, sin taper completo ni preparacion reciente den piscina olimpico (50m), Elisabeth a muestra un nivel halto di consistencia y determinacion. El a logra obtene 3 medaya y 1 Record Nacional nobo pa Aruba.


- Medaya di brons den 50 meter backstroke cu un tempo di 30.12 y esaki ta un Record Nacional nobo. Elisabeth a kibra su propio record nacional anterior (30.30), estableciendo asina un nobo record pa Aruba den e estilo aki.

- Medaya di plata den 50 meter freestyle cu un tempo di 26.30

- Medaya di plata den 100 meter freestyle cu un tempo di 57.19

Aunke e tempo aki di 100 meter freestyle no ta un record nacional ainda, e tempo di Elisabeth aki ta confirma su nivel competitivo fuerte y su preparacion firme pa e temporada cu ta bin.

E resultado nan aki ta muestra claramente cu Elisabeth ta mantene su



forma fisico y mental, sin preparacion specifico ainda di rendimiento. Su profesionalismo, disciplina y enfoko ta sigui

eleva e nivel di natacion Arubano.

Henter e famia grandi di Stingray Swimming Team

ta sumamente orguyoso di su atleta y di manera cu e ta representa Aruba cu excelencia, perseverancia y ambicion deportivo.

Esaki ta djis e comienso di temporada 2026 y ainda tin mas competencia, mas meta, mas historia pa crea.

Dialogo Social riba LAP tabata hopi importante !

38.000 EMPLEADO TA SEGURA BAO DI PENSIOEN GENERAL (LAP)



Ley di Pensioen General (LAP) ta den un proceso di un revision. Na e momentonan aki tin 38.000 empleado cu ta segura bao di e Ley di Pensioen General (LAP) cu a wordo introduci na 2011. E ley aki a wordi introduci den Gabinete Mike Eman I pa motibo cu hopi empleado den sector priva no tabata tin derecho riba un pensioen banda di pensioen di behes (AOV). LAP a wordo introduci pa sigura cu doño di trabao y empleado cera un seguro di pensioen pa e empleado.

Despues di a funciona algun año, Minister President mr. Mike Eman a presidi un serie di dialogo hunto cu SVB y APFA, companianan di seguro y gremionan sindical y comercial pa a evalua e ley y puntonan caminda por realisa mehoracion. E concepto cu a sali for di e deliberacionan aki a wordo presenta Dialuna ultimo den un Dialogo Social.

Minister President mr. Mike Eman, Minister drs. Mervin Wyatt-Ras, Minister mr. Wendrick Cicilia y Minister di

Economia y Finanzas, mr. Geoffrey Wever hunto cu SVB y APFA a participa na e Dialogo Social cu gremionan y companianan di seguro. Minister President mr. Mike Eman a presidi e Dialogo Social cu un enfoque riba participacion balansa di tur gremio y stakeholder.

Director di Banco di Seguro Social di Aruba (SVB), ir. Edwin Jacobs, a expresa su apoyo pa e iniciativa di Gobierno pa revisa e Landsverordening Algemeen Pensioen (LAP) dentro di marco di Dialogo Social. Segun Jacobs, e decision pa pone e ley aki atrobe riba mesa pa evaluacion y mehora esaki, ta un paso responsabel y oportuno.

“E hecho cu Gobierno a scoge pa revisa e Ley di Pensioen General den dialogo cu sindicato y sector relevante ta muestra cu ta abierto pa mehoracion y fortificacion di e sistema,” Jacobs a declara.

Segun e director, durante e proceso a identifica espasio den e ley pa haci clarificacionnan, haci e disposicionnan mas



comprensibel y fortifica derecho di trahado. Pero e cambio mas significativo ta relaciona cu supervision.

Jacobs a splica cu desde 2011 e ley a drenta oficialmente na vigor, y despues di algun año di implementacion, a bira evidente cu supervision structural tabata necesario pa garantisar cumplimiento y transparencia.

E revision proponi ta formalisa e rol di SVB como supervisor di e Ley di Pensioen General. Esaki ta inclui autoridad pa intercambio di informacion entre companianan di seguro y SVB, permitiendo control mas efectivo riba cumplimiento di obligacionnan di dunado di trabou y trahado.

Durante di e Dialogo Social Minister President mr. Mike Eman a comparti un calculacion cu SVB a haci di seguradonan bao di LAP. Ta calcula for

di cifranan disponibel cu 38.000 empleado ta segura bao di LAP na e momentonan aki. Eman a muestra cu esaki sigur ta un adelanto hopi grandi compara cu promer cu tabata tin LAP.

Pero e ta muestra cu e cantidad calcula cu mester tin un segur di pensioen ta 48.000 empleado. Pa e motibo ey e cambionan den LAP pa por controla cumplimiento ta importante.

“Tur trahado tin derecho na un pensioen adicional ariba su AOV, pero tin tambe obligacion pa paga prima corecto y oportunamente,” ir. Edwin Jacobs a enfatisa. El a agrega cu supervision no ta solamente un mecanismo tecnico, pero tambe un responsabilidad social. Den e contexto aki, SVB lo asumi un rol mas activo den comunicacion y conscientisacion, informa trahado riba su derecho y obligacion bou

e ley di pensioen.

Segun ir. Jacobs, e dialogo cu diferente stakeholdernan a confirma cu tin consenso riba importancia di supervision efectivo, transparencia y fortalecimiento di sistema di pensioen priva.

E revision di LAP ta forma parti di un proceso mas amplio di Dialogo Social, cu meta di fortalece sostenibilidad financiero y proteccion social pa trahado di Aruba.

Eman a bisa cu e cambio di e ley di LAP ta bay aumenta e suma tambe cu ta establece e criteria ki ora por lanta tur e placa ahora bao di LAP. Awor ta asina cu si un persona a spaar unicamente algun año y ta haya Afl. 50, == pa luna of menos y por lanta tur e suma ahora. E suma aki ta wordo aumenta na Afl. 100, == of menos e ora por lanta tur e suma ahora. Hopi bes esaki lo kiermen algun mil florin cu por wordo lanta.

MINISTER DOWERS A RICIBI BISHITA DI INTRODUCCION DI COORDINADOR KMAR NA ARUBA

Recientemente Minister di Husticia, Integracion, Transporte Publico y Energia, mr. drs. Arthur Dowers, a ricibi un bishita di introduccion di Tom van Vught di Koninklijke Marechaussee (KMAR), kende ta coordina e cooperacion entre KMAR, Polis, Aduana y Inmigracion na Aruba. Van Vught, cu recientemente a yega Aruba pa tuma encargo como representante di KMAR na nos isla, a reuni cu Minister Dowers pa dialoga riba e estado



actual di cooperacion entre Grenspolitie Aruba, Inmigracion y KMAR, y tambe pa intercambia pensamiento riba maneranan pa fortifica e colaboracion existente. Durante e encuentro, a

enfoca riba e importancia di un coordinacion efectivo entre e diferente instancianan encarga cu control di frontera y maneho di entrada y salida di biaheronan. Un cooperacion solido y structural ta esencial pa garantiza seguridad nacional, mantene orden publico y proteha integridad di nos sistema migratorio.

Bon comunicacion y alineacion entre instancianan local y partnernan den Reino

ta fundamental pa un maneho moderno y efectivo di frontera. Siguridad hunto cu cooperacion ta esencial pa bon resultado. Door di un relacion fuerte cu KMAR, nos por sigui fortifica nos capacidad pa controla frontera y combati irregularidad.

Cu e bishita aki, Gobierno ta duna balor na colaboracion profesional, structural y orienta riba resultado, den interes di siguridad y estabilidad riba Aruba.

KAMBIO STRUKTURAL DI KOMPORTASHON SENTRAL DEN INTERKAMBIO DI SER TOKANTE POLÍTICA DI RESIKLAHE



Willemstad, 26 di febrüari 2026 – E ròl di ‘kambio di komportashon den futuro maneho di resiklahe’ tabata sentral durante un interkambio riba nivel tèkniko resièn ku SER di Kòrsou. Den e kuadro aki, Myrthe George-Verhulst a presentá su investigashon i programa “Resiklahe di plèstik na Kòrsou – Di problema di desecho pa un solushon di komportashon”. Den su presentashon,

George-Verhulst a mostra e urgensia di e situashon: ta kalkulá ku e landfill lo yega na su kapasidat máksimo denter di sinku pa ocho aña, miéntras e volúmen di desecho ta sigui ekspandé pa motibu di kresementu di poblashon, konsumo i turismo. Na mes momentu, solamente un parti limitá di plèstik ta keda resiklá di berdat. Pa SER, e problemátika aki ta forma un punto

importante den su ròl mas ámplio di duna asesoria riba tópikonan di desaroyo sostenibel, kalidat di bida i resistensia ekonómiko di Kòrsou. George-Verhulst a enfatisá ku e núcleo di e problema no ta prinsipalmente falta di un infrastrukutura, sino falta di un komportashon struktural. Na 2026, kapasidat di resiklahe lo ampliá di shete pa diesdos sentro di resiklahe.

Sinembargo, sin cambio di komportashon dirigí, e ampliashon aki no lo trese un oumento sustansial den resiklahe outomátikamente. E programa presentá ta basá riba investigashon di siensia di komportashon, inkluso un análisis ACDR (Architecture, Competence, Drivers, Resistances) di Behavior Change Group, opservashonnan na sentronan di resiklahe i un enkuesta kuantitativo bou di habitantenan di Kòrsou. E konklushon ta kla: hopi hende ke resiklá, pero nan ta eksperensia demasiado bareranan práktiko, falta di klaridat, falta di rutina i insuficiente konfiansa den e sistema. E programa ta tradusí e perspektivanan aki den un ekosistema integrá di komportashon ku 65 intervension konkritu, strukturá riba sinku pilár: hasi resiklahe sumamente fásil; kita duda; hasi resiklahe un rutina diario; stimulá orguyo i identidat; i fortalésé konfiansa den e sistema pa medio di transparensia. Pa SER, e tema aki no ta solamente unu ambiental, sino ta toka varios tópiko den ámbito di maneho sosio-ekonómiko den kua e Konseho tin un responsabilidad di asesoria.

E problema di desecho ta influensia kalidat di bida den bario, atrakshon turístiko dje isla, kompromisonan internashonal di sostenibilidat i reputashon di Kòrsou komo lokalidat pa invertí i establecé. Ademas, implementashon ta rekerí koperashon públiko i privá, ko-finansiamentu i sosten institushonal — temanan ku ta konektá direktamente ku e ròl di asesoria di e SER.

George-Verhulst a hasi un yamada pa responsabilidad kompartí i koperashon struktural entre gobièrnu, sektor privá, organisashonnan sosial i institushonnan di edukashon pa hasi resiklahe e norma sosial nobo na Kòrsou. “E pregunta no ta si nos mester aktua,” segun George-Verhulst, “sino kon leu nos komo komunidad ta dispuesto pa realisá e resiklahe di forma sostenibel.” SER ta enfatisá ku perspektivanan di investigashonnan manera esaki ta duna un aporte balioso pa konsehonan futuro enkuanto polítika di desecho i intervension di komportashon, kaminda diálogo sosial i koperashon entre sektornan públiko i privá ta esencial.

SOPI DI LETRANAN

Z	P	Y	X	W	I	W	V	Y	O
D	Ñ	U	Q	M	Ñ	J	Y	C	D
L	S	Y	Y	Q	R	Ñ	O	A	I
P	A	Ñ	T	F	G	R	D	H	F
A	L	O	X	C	C	A	S	C	U
R	T	S	N	H	J	R	W	O	B
D	E	K	E	I	O	Y	F	R	Y
I	R	H	U	D	V	Y	B	C	U
N	O	Q	I	U	L	I	I	O	U
A	P	L	D	E	F	D	L	V	C
Y	O	A	T	S	I	U	F	O	A
P	R	N	I	A	R	Q	J	L	L
E	A	M	N	A	R	U	W	E	V
C	B	O	H	P	M	L	F	T	E
A	D	A	L	B	O	D	I	B	Z

ALTERO
BUFIDO
CALVEZ
CANTEL
CIDIANO
CORCHE
CORCOVO
DOBLADA
OLIVINO
PARDINA
POLIDOR
QUIJADA

SUDOKU

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

							3	9
	8							5
		9		6		8		
		5		9				6
7								
		8	4		6			
		3		8			5	
	2		7			6		
4						1		

Oracion di dia

Un dia fructifero y cu e
luz di Cristo por briya den
cada un di nos

" ... Pasobra tur hende cu halsa nan mes, lo keda humilia, ma esun cu humilia su mes, lo keda halsa". Lucas 18,14

Awe nos ta lesa e importancia di humildad y reconece nos faltanan. Nos por ta manera e fariseo husgando otro y halsando su mes of manera e cobrado di belasting ta reconece su falta y su necesidad di compasion. Cu humildad nos ta sirbi otro sin busca recompensa; scucha mas y papia menos, na balora e otronan pa loke nan ta y no pa loke nan tin of ta aparenta di ta. Reflexionando continuamente ta yuda evita na cay den orguyo y na mantene nos mirada fiho den e mision cu Señor a confia nos. Biba cu berdadero humildad ta nifica rechasa e mascaradanan cu hopi biaha nos ta pone pa impresiona of pa competi cu otro. No biba un bida superficial of di falsedad, sea un luz pa mundo unda e luz di Cristo ta briya den bo. Loke ta importa no ta con otronan ta mira nos, sino con Dios ta mira nos. Ser bo mes y cu humildad ta acerca nos na e berdadero esencia di nos fe y esey ta haci nos un instrumento den e man di Dios.

Oracion : Señor Hesus, haci mi curason pareu na bo curason. Manso y humilde y obedecido na bo Santa boluntad.

Amen.

Condicionnan insigur na KIA: Minister Dowers tin atencion pa e situacion na KIA



Diahuebs merdia, Minister di Husticia, mr. drs. Arthur Dowers, a haci un bishita na Instituto Coreccional Aruba (KIA) pa reuni cu ciudadonan di preso y scucha directamente nan preocupacionnan.

Segun e ciudadonan di preso, pa basta aña nan a sinti cu Gobierno a lubida riba nan, aunke nan ta cumpli cu un tarea esencial y peligroso den nos sistema di husticia. Durante e reunion, e empleadonan a expresa nan preocupacionnan abiertamente y despues nan a haci un recorrido hunto cu e Minister den diferente area di KIA.

Durante e bishita, Minister Dowers a haya un bista cla di e estado di deterioro preocupante di e facilidad coreccional. E condicionnan actual ta afecta directamente e siguridad tanto di e personal cu ta traha eyden como di esnan cu ta cera den KIA. E situacion ta alarmante y Minister tin atencion pa esaki.

Mirando e estado deplorabel di KIA, Minister di Husticia ta sondeando activamente e posibilidad pa construi un facilidad coreccional completamente nobo, moderno y structural, cu

ta cumpli cu tratadonan internacional riba derechonan humano y normanan di siguridad. Sin embargo, un proyecto di tal magnitud ta rekeri tempo y planificacion, y lo dura varios aña pa realisa.

Mientrastanto, e realidad ta cu e personal di KIA mester sigui cumpli cu nan responsabilidad den un ambiente insigur. Minister Dowers a haci e compromiso di lo analisa tur e retonan presenta tanto riba nivel profesional como institucional, y identifica solucionnan sostenibel pa reduci presion riba siguridad y fortifica e sistema.





CROSSWORD

WORD SEARCH PUZZLE



Fruits





Across

3. A big fruit you eat in the summer.
5. What fruit do monkeys like?
6. A red fruit.



Down

1. Purple fruit.
2. A small red fruit.
4. _____ juice.



“Señor ta mi wardador, mi’n tin falta di nada
Den cunucu di yerba berde e ta ponemi sosega.E ta hibami na awa trankil,
Pa mi bolbe haña forsa”.Salmo: 23
Cu profundo dolor y tristeza na nos curazon pero conforme cu boluntad di Dios y
agradecido pa tur locual ela nifica pa nos, nos ta participa fayecimento di:

**Sra. Leoncita Ceferina
Donata-Danies**

Mihor conoci como Chia,
*06-11-1936 - †23-02-2026
Vda. di dfm. Federico Mercelino Donata



Su yuinan:
Franklin Donata
Vda. Vilma Marchena-Donata
Marlene Escobar-Donata y esposo Luis Escobar
Sherwin Donata y esposa Ingrid Donata-Franken

Nuera:
Maria Ridderstaat

Yerno:
dfm Charles (Boei) Marchena y yuinan y famia

Su nieta nan y nieto:
Vanessa Donata y Angelo Anthony, Charlene Marchena, Je-an Donata y Rensley Vrolijk,
Vilencha Marchena y Jason Leest, Luigene Escobar

Su bisanieto nan y bisanieta:
Dayvion Willems, Kaedan Geerman, Geetesh Outar, Jayviënne Leest

Inmensamente agradecido na su ayudante nan:
Elsy, Cecilia, Madeleine, Karen, Charline
Y tur cu a duna un man pa su cuido

Su amistad nan di semper:
Maria Dijkhoff, Andrea Dirks, Denisia Kock-Dijkhoff, Corry Laclé, Astrid y Ronchi na
Corsow, Nanita Marti na Corsow

Sobrina y sobrino nan y nan famia, Prima y primo nan y nan famia

Tur iha nan / esnan mas yega na dje: Elmira Colmenares, Meveline Danies, Maria Brete,
Carmensita Danies, Nino Faro

Su comper y comer nan

Bon bisiñanan: Brete y Dijkhoff
Demas bisiñanan, famia y conocirnan, Tur cu a dune atencion durante su enfermedad

Inmensamente agradecido na su dokter di cas dr. M. van den Ham y su team di Cas di
Dokter pa nan excelente atencion y servicio cu semper nan a brinda.

Ta invita pa acto di condolencia y entierro cu lo tuma lugar diamars 3 di maart 2026 di 2or
pm - 4or pm na Aurora Funeral Home y despues pa Santana Catolico Pastoor Kraanwinkel
na Paradera.

Nos disculpa si pa motibo di nos dolor y tristeza nos por a lubida di
menciona un of otro famia.

Ta duel nos pero nos no por ricibi bishita di condolencia na cas.

Ta bai tin 3 Santo Sacrificio di Misa na Misa Santa Filomena na Paradera dia nan:
5 maart 2026 7or pm, 7 maart 2026 7or pm, 10 maart 2026 7or pm

Despues di e ultimo Santo Sacrificio di Misa ta bay tin un
Santo Rosario na cas Tanki Leendert 98-A.



"DUDAS"
Pakiko bo ta duda di mi existencia
jen di miedo i temor ta temozabo
cuanto biaha mi no a pidi bo confia
den mi i asina dunabo tur mi apoyo.
Cuanto biaha bo a lubida cu ami tey
pa consola bo curason jen di tristesa
ora ta orando ami ta sinta mey mey
scuchando bo bos pidiendo judansa.
Tin biaha mi ta mirabo tur disgusta
ni sikiera un bon dia bo ni a dunami
pa bo tur cos a bai malo i aki duda
a drenta bo curason sin consultami.
Mi yiu stima corda cu ami ta Amor
mi Paz mi yiu homber a entrega
pa kita tur tristesa,miedo i dolor
creando speransa pa sigui truinfa.
Nunca duda den mi promesanan
rikesa i banidad no ta pa eternidad
si bo sigui confia den mi palabranan
tur bo sonjonan mi lo haci realidad.
" PALABRA DI DIOS."
Duda ta un obstaculo pa ricibi respuesta
di nos TATA CELESTIAL.
Mateo 14:31 / Exodo 32:1
Autor: Omaira I.Rodriguez-Britten

CREMACION DI CURPA DI UN DEFUNTO TA PROHIBI PA DIOS TATA

Nos por mira claramente cu den Bijbel e tradicion di Israel, e hudiunan ta dera semper nan curpa morto. Mientras cu den mundo tin pueblonan den creencianan paganismo, den reencarnacion y nan si ta crema y ta kima nan curpa morto. Tin paisnan na mundo no ta permiti cremacion di curpa. Bijbel ta bisa, cu nos curpa ta bira stof manera cu mester ta durante tempo, pero Bijbel no ta bisa, cu nos curpa ta bira shinishi pa medio di kimamento di curpa. Den Bijbel Genesis 3: 19, Dios Tata ta bisa: “Cu sodo di bo frenta lo bo come pan te dia cu bo bolbe den tera, pasobra ta di eynan bo a wordo saka. Pasobra di stof bo ta y di stof bo ta bolbe bira.”

Bijbel Eclesiastes 12: 7 ta bisa: “Bo curpa ta bolbe bira stof, ta bay bek den tera y bo alma ta bay bek na Dios, pasobra ta El ta esun cu a duna b’e.” E tradicion di deramento di curpa, ta wordo demostra den Bijbel Testamento Bieuw y tambe den Testamento Nobo. Lesa loke Bijbel ta bisa den 1 Corinthionan

15: 44, Apostel Pablo ta bisa: “Ta dera un curpa mortal y un curpa spiritual ta lanta for di morto.” Den Bijbel Mateo 27: 59 y 60: “Hose di Arimatea a cohe e curpa di Hesus, a lor’e den un panja nobo di lenen y a pon’e den su mes graf. Tabata un graf nobo cu el a laga coba den baranca.” I tin hopi mas capitulonnan den Bijbel cu ta papia di deramento di curpa y no di kimamento di curpa. Pa medio di bautismo, nos curpa ta tempel di Dios Spirito Santo cu ta biba den nos y ta haci nos curpa un instrumento di honor pa Dios Tata. Por mira e curpanan di e Cristiannan y di e Santonan cu a muri hopi siglonan pasa y nan curpa a keda intacto, incorumpibel pa motibo di nan bida santo. Por ehempel, San Padre Pio, Sta. Bernadette Soubirous, Sta. Cecilia, San Huan Bosco, San Juan Vianney y hopi mas defuntonan cu a muri y nan curpa a keda incorumpibel, den Bijbel e salmo 16: 10 y 11 ta bisa: “Pues Bo no ta entrega mi alma na morto, ni Bo ta laga mi curpa sufri corrupcion. Bo ta muestra

mi e caminda di bida, e goso grandi cu ta di mira Bo Cara, delicianan pa eternidad banda di Bo.” Pesey ta con un famia ta laga crema curpa di nan ser stima y mientras cu Cristo-Hesus kier pa curpa di hende keda incorumpibel pa motibo di nan bida Cristian y santo? Cristo-Hesus mes a wordo dera y E’l a lanta Su mesun curpa for di morto, p’esey tur hende Cristian ta kere cu nan deramento den santana ta un testimonio pa e Resurreccion cu tin di bini. Nos curpa ta tempel di Spirito Santo y p’esey nos curpa mester wordo trata cu honor y cu respet. Ta con un famia lo bai sinti, cu nan ser stima a pasa pa medio di candela ardiente y a bira shinishi? Na anja 1886, e Santo Oficio di Vaticano a prohibi e cremacion di curpa na e funeralnan. Na final di siglo 19, tabata tin lantamento y protestanan di hendenan no Catolico na Europa pa promove e cremacion di curpa. E Iglesia Catolico a rechasa e movimientonan aki, pasobra e hendenan aki cu ta defende cremacion, nan tabata

rechasa e creencianan Cristian di inmortalidad di alma y nan no tabata kere den e resurreccion di curpa. E Codigo di Derecho Canonico di anja 1917, Iglesia Catolico ta prohibi un deramento Cristian, na cualkier persona cu a ordena pa su curpa wordo crema. Na anja 1963 Vaticano a cuminsa permiti cremacion di curpa, solamente ora un persona muri den enfermedad di epidemia, na paisnan na unda cu no tin lugar pa dera y na ora di desasternan y guerra. E Codigo di Derecho Canonico actual di anja 1983 den e Canon 1176 ta bisa: “Iglesia Catolico ta conseha su fielnan, pa conserva e piadosa custumbenan di deramento di curpa di e defuntonan.” Awor, ta e famianan ta keda responsabel, si ta dera nan defuntonan manera cu Dios Tata kier of manera e otro creencianan di mundo ta haci. E responsabilidad aki ta keda pa cada un di nos dicidi segun su consenshi.

Seferino Tromp

Fraccion AVP – Parlamentario Carlos Bermudez

SATISFECHO CU GOBIERNO TA DUNA OIDO NA VOZ DI PUEBLO PA PROTEHA ACCESO LIBER NA BEACHNAN

ORANJESTAD (25 di februari 2026) – Durante e di dos dia di tratamiento di e Presupuesto Supletorio 2025, Parlamentario Carlos Bermudez, na nomber di fraccion AVP, a entrega un mocion formal den Parlamento caminda ta pidi gobierno pa ahusta of presenta un beach policy nobo cu ta garantisa y salvaguardia e derecho di localnan y turistanan pa hazi uzo liber di nos beachnan. Segun Bermudez, e acceso liber na beach ta un principio

fundamental pa Aruba como destino turistico y como comunidad. “Nos beachnan ta parti di nos patrimonio natural y cultural. E derecho pa acceso liber no por wordo limita of restringi pa interesnan particular,” el a declara.

Den e mocion, fraccion AVP ta solicita gobierno pa inicia implementacion di e beach policy, sea e version ahusta of un politica nobo, no mas tarda cu comienzo di 2026. E meta ta pa tin plan cla pa ehecuta cu ta preveni

situacionnan di exclusion y confusion riba beachnan publico.

Bermudez a indica cu el a tuma nota cu satisfaccion di e anuncio reciente di Minister di Turismo, Wendrick Cicilia, y Minister di Infraestructura, Rene Herde, cu pronto lo tin un ahustacion di e beach policy existente.

“Esaki ta muestra cu ora Parlamento entrega un mocion cu base riba preocupacion legitimo di pueblo, Gobierno ta honra e mocion y ta tuma accion. Asina e sistema mester traha,” Bermudez a enfatisa. El a agrega cu AVP ta insistí riba un politica cu ta cla, transparente y aplicabel, pa evita situacionnan manera ta observa na otro paisnan den region. “Nos no kier y nos no lo acepta nunca un



escenario caminda pueblo mester mendiga pa subi riba un beach, caminda acceso ta prohibi of caminda mester paga simplemente pa disfruta di lama. Esaki no ta y nunca lo ta e modelo pa Aruba.”

Fraccion AVP ta reafirma su compromiso pa sigui

monitor e proceso di revision y implementacion di e beach policy, cu meta pa proteha acceso liber, mantene ekilibrio entre desaroyo turistico y interes di comunidad, y salvaguardia nos beachnan pa generacionnan presente y futuro.

Clasificados

SOLODIPUEBLO@GMAIL.COM
CEL. 585 9500